

vero corporum metallorum præparata, pro corpore azimo vel rubeo. Spiritus vero albus vel rubeus ex corporibus extrahitur, vel figitur, & præparatur ab ipsismet spiritibus. Si cæteris autem lapidibus abluatur lapis & mundatur, figitur & tingitur, & rectificatur in operis festinatione. In commistione vero proportionata prædictorum præparatorum resultat nova forma, & sic fit elixir, in quantum materia plus quam Sol naturalis est digesta & tincta.

Finis Rosarii minoris, incerto Auctore.

MAGISTRI ALBERTI MAGNI EPISCOPI Ratisbo- nensis, De Alchemia Præfatio.



MNIS sapientia à Domino Deo est, & cum illo fuit semper, & est ante ævum. Quicumque ergo diligit sapientiam, apud ipsum quærat, & ab ipso petat, quia ipse dat omnibus affluenter, & non improperat. Ipse enim est altitudo, & profunditas omnis scientiæ, & thesaurus totius sapientiæ: quoniam ex ipso, & in ipso, & per ipsum sunt omnia: & sine ejus voluntate nihil potest fieri: ipsi honor & gloria in secula seculorum. Amen.

Vnde in principio mei sermonis invoco ejus auxilium, qui est fons & origo omnium bonorum, ut ipse per suam bonitatem & pietatem dignetur parvitatem scientiæ meæ supplere per gratiam sui Spiritus sancti, ut per meam doctrinam lumen quod in tenebris latet, manifestare valeam, & errantes ad semitam veritatis perducere: quod ipse præstare dignetur qui sedet in excelsis, Amen.

Cum multas regiones & plurimas provincias, nec non civitates & castella causa scientiæ, quæ vocatur Alchemia, maximo labore perlustraverim, & à literatis viris & sapientibus, de ipsa arte ab ipsis diligenter inquisierim, ut ipsam plenius investigarem: & cum scripta omnia perscriberem, & in operibus ipsorum sæpissime persudarem, non inveni tamen verum in his, quæ libri eorum affirmabant. Aspexi ergo libros contradicentium & affirmantium, & inveni eos vacuos esse ab omni profectu, & ab omni bono alienos. Inveni enim multos prædivites literatos, Abbates, Præpositos, Canonicos,